

Museo Arqueologico Nacional Aruba lo tin su 'Open House' riba Dia di Betico



Weso na sitio

ORANJESTAD - Dia di Betico, Museo Arqueologico Nacional Aruba lo tin su 'Open House' na su edificio den Schelpstraat 42 Oranjestad, entre 10 am pa 2

pm. Publico por tira un bista entre otro den e laboratorio di Departamento Cientifico, caminda ta studia hayazgonan di excavacionnan.



Material arqueologico den laboratorio



Bishitantenan den depot di material arkeologico



Binnenmuur historico

Tambe por admira e deposito di e coleccion nacional di artefactonan arqueologico. E deposito aki di Museo ta uno di esnan mas moderno den Caribe y tabata un regalo na Aruba di Fondo Europeo pa desarojo.

Mas cu claro e edificionan historico cual originalmente tabata cas di famia Ecury tambe lo por ser bishita. E edificionan aki awendia ta alberga salanan di exposicion, oficinanan, salanan di reunion y hasta un biblioteca. Esnan cu no a yega di bishita e exposicion permanente di Museo Arqueologico Aruba ainda, lo haya nan mes cu un exhibicion cu ta cosecha elogio y sembra orguyo serca bishitantenan.

Internacionalmente museonan y otro instancianan cultural ta cuminsa realisa cu edificionan historico tambe ta forma parti di nan coleccion y cu ta importante pa duna ac-

ceso na publico segun esaki ta posibel. Museo Arqueologico Nacional Aruba ta convenci cu un 'Open House' asina ta yuda conscientisa un y tur di e balor di e edificionan historico y e importancia pa conserva esakinan. Banda di esey ta fomenta aprecio y respet pa esnan cu dia tras dia ta esfuerza nan mes pa conserva y promove nos herencia cultural.

E 'Open House' di MANA ta forma parti di un ruta di Museonan y Galerianan na Playa cu ta habri pa publico riba Dia di Betico entre 10 di mainta pa 2 di merdia, cuminsando cu e opening di e Exposicion di 'Rancho' na Weststraat z/n pa 9'or di mainta. Tambe Museo Historico na Fort Zoutman, Ateliers '89 na Dominicanessstraat, UNOCA y Studio na Stadionweg lo habri pa publico enriquece su mente y alma cu storia, historia, arte y cultura di nos isla. □